

on 07 June 2012

KOTA SAMARAHAN 5 Jun - Seramai 501 pelajar pra universiti menamatkan Minggu Aluan Pelajar Universiti Malaysia Sarawak (Unimas) Khamis lalu.

Program empat hari itu sarat dengan pelbagai aktiviti bagi menerapkan nilai keharmonian, kekeluargaan dan semangat 1Malaysia dalam kalangan siswa dan siswi.

Pengarah program, Abdul Al-Hafiz Ismail berkata, seramai 30 pensyarah juga dipilih untuk menjadi mentor kepada pelajar baru kali ini.

Katanya, pendekatan itu diambil bagi memastikan setiap pelajar berada pada landasan betul sepanjang tempoh satu tahun pengajian mereka.

"Pelajar dikehendaki sentiasa berhubung dengan mentor masing-masing sekiranya mereka mempunyai masalah dalam akademik mahupun peribadi.

"Di samping itu, ia juga membantu pelajar supaya tidak berasa terasing walaupun berjauhan dengan keluarga mereka," katanya kepada Utusan Malaysia di sini baru-baru ini.

Sepanjang program berlangsung, semua pelajar terbabit dipecahkan kepada beberapa kumpulan kecil pelbagai kaum supaya mereka saling mengenali dan berbincang mengenai hal ehwal akademik, kokurikulum dan sejarah Unimas.

Mereka turut didedahkan dengan taklimat keselamatan semasa di universiti, taklimat penggunaan perpustakaan dan perkhidmatan pengangkutan bas dalam kampus.

Sementara itu, pelajar Asasi Sains Hayat, Mohammad Shafiq Mohamad, 18, berkata, Unimas menyediakan ruang secukupnya bagi membolehkan pelajar baru memahami hubungan antara kaum yang menjadi prasyarat kejayaan negara.

"Apabila saya ditawarkan menyambung pengajian di universiti ini barulah saya menyedari negara ini mempunyai pelbagai kaum yang kaya dengan budaya dan adat masing-masing," katanya yang berasal dari Bandar Baru Bangi, Selangor.

sumber : **Utusan online**